

Umiarsuarnik nalunaarsuineq pillugu maleruagassat Kalaallit Nunaannut atuutilerineri pillugit peqqussutip Namminersorlutik Oqartussanit akuerineqarnissaa pillugu Inatsisartut aalajangiiffigisassaattut siunnersuut
(Ineqarnermut Attaveqaqatigiinnermullu Naalakkersuisoq)

Saqqummiussinermit allakkiaq
(Ineqarnermut Attaveqaqatigiinnermullu Naalakkersuisoq)

Siullermeerneqarnera

Naalakkersuisut sinnerlugit imarsiornermut inatsimmi umiarsuit nalunaarsorneqartarneri pillugit allannguutissanut arlalinnut aalajangiiffigisassatut siunnersuutit saqqummiunneqarput.

Siunnersuuteqarnermi inatsisit atuuttut inatsisitut naleqqunnerusunngorlugit naapertuunnerusunngorlugillu nutarterneqarnissaat siunertarineqarpoq. Aamma siunnersuuteqarnerup kingunerisaanik umiarsuarnik nalunaarsuisarneq digitaliseererneqassaaq.

Ukiuni kingullerni danskit imarsiornermut inatsisaanni arlalinnik allannguisoqartarsimavoq, Inatsisartullu akuersinerisigut taakku aamma Kalaallit Nunaanni umiarsuarnik nalunaarsuisarnermut inatsisinik naleqquttunik, minnerunngitsumillu naapertuuttunik inatsiseqalernermik kinguneqartitsisinnaapput.

Umiarsuit ullumikkut Kalaallit Nunaanni angerlarsimaffeqartut Danmarkimi umiarsuarnut nalunaarsuivimmut nalunaarsorneqartarput, tassalu imaappoq umiarsuarnut nalunaarsuivimmut aamma angallatinut taaguutit allattorsimaffiinut nalinginnaasunut. Maleruagassat danskit kalaallillu umiarsuaannut atuutsinneqartut assigeeqqissaanngillat, danskit maleruagassaasa ilaat Kalaallit Nunaannut atuutsinneqalersimangimmata.

Danmarkimi umiarsuarnut nalunaarsuiffik digitaliseererneqarluni suliarineqarpoq. 2006-imi inatsisissamut allannguutitit arlallit, aammalu 2019-imi iluarsiiinerit ataasiakkaat minnerit, atortunik digitaliseeriinerup atorneqalernissaata piareernerani atuutsinneqalersussat Folketingimit akuersissutigineqarput. Tamatuma 2020-mi qaammatit pingasukkaat pingajuanni pinissaa naatsorsuutigineqarpoq.

Umiarsuit nalunaarsorsimaffiinik digitaliseeriisinnanermut tunngatillugu, maleruagassat aamma Kalaallit Nunaannut aammalu umiarsuarnut Kalaallit Nunaanni angerlarsimaffeqartunut atuutsinneqalernissaat pingaaruteqarpoq. Taamaalillu aamma kunngikkormiut peqqussutaat manna naapertorlugu Kalaallit Nunaata digitaliseeriinermi iluaquserneqarnissaa qulakkeerneqassaaq. Allakkanik nassiussisarnerit pappiaqqanillu

uppernarsaatissanik nalunaarsuisarnerit maannamut atorneqartut unitsinneqarsinnaalissapput. Taamaattumik maleruagassat akuerisat ataatsikkut Danmarkimi aamma Kalaallit Nunaanni atuutilernissaat siunnersuutigineqarpoq.

Tassunga atatillugu erseqqissaatigineqassaaq, umiarsuarnik nalunaarsuiviup digitaliseererneqarnera uppernarsaatissanik pappiaqqanik nassiussisarunnaarlunnarnermik kinguneqartussaangimmat. Assersuutigalugu inuit, atorlut digitaliusut atorlugit atsiornissamut periarfissaqanngitsut, imaluunniit atuinissamik kissaateqanngitsut umiarsuarnik nalunaarsuiviup digitaliseerererata kingorna allanut namminneq sinnerlutik umiarsuarnut nalunaarsuiffimmut atorlut digitaliusut atorlugit nalunaaruteqarnissamut piginnaatitsissuteqarsinnaalissapput.

Aamma digitaliseeriinerup kingunerisaanik maanna umiarsuit nunamit suminganneernerinut uppernarsaatini umiarsuarmiititsisarnissaannut piumasagaataasoq atorunnaassaaq, paasissutissat digitaliusut oqartussaasunit pigineqarmata. Aamma umiarsuarnut nalunaarsuivimmum maleruagassat allanngornerisigut sunngiffimmi angallatit 5 bruttotonsit sinnerlugit aamma 20 bruttotonsit inorlugit angissusillit umiarsuarnut nalunaarsuivimmi allassimajunnaassapput, tassungali taarsiullugu angallatit allattorsimaffiini allassimasalissapput. Ullumikkut angallatit taamaattut Kalaallit Nunaanni 100-t missaanniipput. Angallatinut taakkununga ikaarsaarnermi aqqissuussinermik suliaqartoqassaaq, taamaalillunilu angallatit qularnarveeqqusiussaarluni taarsigassarsinermi allagartamik peqarpata, taakku umiarsuarnut nalunaarsuiffimmiit inunnut nalunaarsuiffimmut nuunneqarsinnaalissapput. Siunissaq eqqarsaatigalugu tamanna angallatit piginnittuinut oqartussaasunullu allaffissornikkut oqinnerulersitsissaaq. Assersuutigalugu inunnut nalunaarsuiffimmi angallammik piginnittuusimasut tamarmik uppernarsarneqarnissaat piumasagaatigineqanngilaq.

Peqqussutip matuma akuerineqarnerani siunissami ilaatigut angallatip pappiaraataasa isumagineqarnissaat ajornannginnerulissaaq, taakku digitalimik pigineqartussaammata, taamaalillunilu pappiararsornerit amerlanertigut oqimaassinnaassut pinngitsoortinneqartussaallutik.

Taamatut oqaaseqarlunga Naalakkersuisut sinnerlugit immikkoortoq Inatsisartuni kajumittumik suliaassanngorlugu tunniuppara.